

दिनांक 18.10.2024

समय: 18.45 बजे

आकाशवाणी जयपुर-अजमेर

प्रादेशिक समाचार

- प्रदेश की 7 विधानसभा सीटों में उपचुनाव सारू पचा दाखिल करण रो काम सरू व्हयो।
- राइजिंग राजस्थान ग्लोबल इन्वेस्टमेंट समिट रा तहत खान हलका ऊं जुड्या 45 हजार करोड़ रुपया ऊं बत्ता मोल रा करार करी ज्या।
- नगरीय विकास अर स्वायत्त शासन राज्यमंत्री झाबर सिंह खरा कह्यो – आखिरी छोर माथे बैट्या लोगों की समस्याओं आगी करण माथे सरकार रो खास ध्यान।
- जयपुर रा जवाहर कला केन्द्र मांय 27 वों लोकरंग महोत्सव सरू व्हयो।

000

प्रदेश रा सात विधानसभा हलकों झुंझुनू, देवली, खींवर, दौसा, चौरासी, रामगढ़ अर सलूबर मांय 13 नवंबर ने व्हेण वाळा उप-चुनाव सारू अधिसूचना जारी कर दीरीजी है। ई सागे ई नामपाना दाखिल करण रो काम सरू व्हे ग्यो है। उम्मीदवार 25 अक्टूबर ताई पचा दाखिल कर सकेला। पचा री जांच 28 अक्टूबर ने करी जावेला। उम्मीदवार 30 अक्टूबर ताई नाम पाछा ले सकेला। उप उपचुनाव सारू पड़बा वाळा वोटों री 23 नवंबर ने गिणती व्हेला। मुख्य निर्वाचन अधिकारी नवीन महाजन बतायो के आं हलकों मांय व्हेण वाळा विधानसभा उपचुनाव मांय 19 लाख 36 हजार ऊं बत्ता मतदाता वोट देवण रो हक इस्तेमाल कर सकेला। मुख्य निर्वाचन अधिकारी बतायो के ई सारू आं 7 विधानसभा हलकों मांय 1 हजार 862 मतदान केंद्र अर 53 सहायक मतदान केंद्र बनाया जावेला। वे बतायो के चुनाव लड़बा वाळा सगळा उम्मीदवारों अर सियासी पार्टियां ने वां री बेबसाइट, टीवी चैनल्स, राष्ट्रीय अर स्थानीय अखबारों मांय उम्मीदवार रो आपराधिक रिकॉर्ड व्हेण रा हालात मांय कम ऊं कम तीन दफा इण री जाणकारी देवणी व्हेला। विधानसभा उप चुनाव रा ऐलाण सागे ई राज्य मांय सियासी हलचल ई तेज व्हेण लागी है। राज्य रा पैली वाली मुख्यमंत्री अशोक गहलोत कह्यो के दूजी पार्टियां सागे गठबंधन रा बारा मांय फैसलो हाईकमान करेला। वे कह्यो के कांग्रेस पार्टी आं उप चुनाव मांय जीत दर्ज करेला। दूजी कानी भाजपा रा प्रदेश अध्यक्ष मदन राठौड़ शुक्रवार ने जयपुर मांय कह्यो के जिताऊ उम्मीदवारों ने पार्टी रा टिकट दिया जावेला। वे कांग्रेस माथे लोकसभा चुनाव रे दौरान आरक्षण खत्म करण रो भ्रम फैला र मतदाताओं ने गुमराह करण रो आरोप माण्ड्यो। वे कह्यो के जनता मांय अब वो भ्रम खत्म व्हे ग्यो है। उपचुनाव वाळा सगळा हलकों मांय प्रशासनिक तैयारियां ई जोर पकड़ लीनो है। मुख्य निर्वाचन अधिकारी नवीन महाजन दौसा रा अहलकारों सागे मीटिंग कर र जरूरी हुकम दीना। डूंगरपुर रा जिला निर्वाचन अधिकारी अंकित कुमार सिंह शुक्रवार ने चौरासी विधानसभा हलका मांय व्हेण वाळा उपचुनाव रा बारा मांय अहलकारों सागे मीटिंग कर र पोलिंग पार्टियां री रवानगी अर ईवीएम स्ट्रॉन्ग रूम व्यवस्था रो जायजो लीनो।

000

प्रदेश रा खान हलका मांय 45 हजार करोड़ रुपया ऊं बत्ता रा निवेश प्रस्तावों सारू करार माथे सही करी ज्यी है। 8 नवंबर ने जयपुर मांय व्हेण वाळा प्री समिट मांय खान हलका मांय 50 हजार करोड़ रुपया ऊं बत्ता मोल रा निवेश रा करार माथे सही करी जावेला। खान अर

पेट्रोलियम विभाग रा प्रमुख शासन सचिव टी. रविकान्त आ जाणकारी दीनी। उदयपुर मांय खान हलका रा नुमाइन्दा सागे बातचीत करता थकां रविकान्त कह्यो के राज्य सरकार खान हलका ऊं जुड़्या लोगां री व्यावहारिक राय ने ध्यान राखता थकां बेगी ई नुवी खनन नीति लावेला। ई बीचे जयपुर ग्रामीण अर दूदू जिलां रो जिला स्तर रो निवेशक सम्मेलन 8 नवंबर ने जयपुर मांय राख्यो जावेला। इण री तैयारियां रो जायजो लेवण सारू आज जयपुर रा जिला कलेक्टर रा दफ्तर मांय संबंधित महकमां रा अहलकारां री मीटिंग राख्यी ज्यी। मीटिंग मांय जिला कलेक्टर डॉ. जितेन्द्र कुमार सोनी अहलकारां ने जरूरी हुकम दीना। वे अहलकारां ने कारोबारियां सागे संपर्क कर र वां ऊं बत्ता ऊं बत्ता निवेश बाबत् अरज करण सारू कह्यो। राइजिंग राजस्थान ग्लोबल इन्वेस्टमेंट समिट 2024 रा तैत सीकर मांय 23 अक्टूबर ने जिला स्तर रो निवेशक सम्मेलन व्हेला। जिला कलेक्टर मुकुल शर्मा खबरनवीसां ने बतायो के जिला मांय हाल ताई 81 करार रा बारा मांय सहमति बणी है ज्यां रे जरिये 1 हजार 244 करोड़ रुपया रा निवेश सागे 2 हजार ऊं बत्ता लोगां ने नौकरी-धंधा रा मौका मिलण रा आसार है। सीकर मांय राइजिंग राजस्थान ग्लोबल इन्वेस्टमेंट समिट रा तैत जिला स्तर रो निवेशक सम्मेलन 23 अक्टूबर ने राख्यो जावेला। जिला कलेक्टर मुकुल शर्मा बतायो के हाल ताई 81 करार बाबत् सहमति बणी है, ज्यां रा तैत 1 हजार 244 करोड़ रुपया रा निवेश ऊं करीब अढ़ाई हजार लोगां ने नौकरी-धंधा रा मौका मिलेला।

झालावाड़ मांय ई 21 अक्टूबर ने जिला स्तर री राइजिंग राजस्थान इन्वेस्टर मीट राख्यी जावेला।

000

प्रधानमंत्री नरेंद्र मोदी काल नई दिल्ली मांय कर्मयोगी-राष्ट्रीय शिक्षण सप्ताह-एनएलडब्ल्यू रो उद्घाटन करेला। ई रा तैत मंत्रालयां अर न्यारा-न्यारा महकमां मांय नुवी नौकरी लाग्या कर्मचारियां ने सिखावण दी जावेला। हर कर्मचारी ने ई दौरान कम ऊं कम 4 घंटा री सिखावण लेवणी व्हेला। सप्ताह रे दौरान, नामी वक्ता विशेषज्ञता ऊं जुड़्या मुद्दां माथे व्याख्यान देवेला।

000

नगरीय विकास अर स्वायत्त शासन राज्यमंत्री झाबर सिंह खर्वा कह्यो है के राज्य सरकार जनता री परेशानियां रा निपटारा सारू पूरी प्रतिबद्धता अर समर्पण भाव सागे काम कर रही है। आज जोधपुर मांय जनसुणवाई कर र अहलकारां ने जरूरी हुकम दीना। जनसुणवाई सारू मोटी तादाद मांय जोधपुर अर आरे-सारे री जनता पूगी।

000

ऊर्जा राज्य मंत्री हीरालाल नागर कह्यो है के सरकार बिजली रो उत्पादन बधावण सारू लगातार जतन कर रही है। वे आज कोटा मांय बोल रह्या हा। वे बतायो के सरकार 32 हजार मेगावाट बिजली और बणावण सारू योजना बणा रही है। ऊर्जा मंत्री कह्यो के ई साल नौजवानां ने एक लाख ऊं बत्ती नौकरियां दी जावेला।

000

27 वों लोकरंग महोत्सव आज जयपुर रा जवाहर कला केन्द्र मांय सरू व्ह्यो। 11 दिन रा ई महोत्सव मांय राष्ट्रीय लोक नृत्य समारोह मनायो जा रह्यो है अर राष्ट्रीय हस्तशिल्प मेळो लगायो जा रह्यो है। महोत्सव मांय 24 राज्यां रा करीब 4 हजार कलाकार सिरकत कर कर्या है। रुडा री मदद ऊं शिल्पग्राम मांय संवारे 11 ऊं रात 10 बज्या ताई लगाया जावण वाळा ई मेळा मांय हाथ ऊं बण्या डोढ़ सौ ऊं बत्ता उत्पादां री स्टॉल्स लगायी जा रही है। राष्ट्रीय लोक नृत्य समारोह रा तहत प्रदेश री लोक कलावां सागे पंजाब, महाराष्ट्र, उत्तर प्रदेश, मध्य प्रदेश, असम, त्रिपुरा, उत्तराखंड अर हिमाचल प्रदेश समेत न्यारा-न्यारा राज्यां रा कलाकार लोक कलावां रो दर्शाव करेला।

000

जयपुर स्थापना दिवस समारोह आज मोती डूंगरी गणेश मंदिर मांय गणपति री पूजा सागे सरू व्ह्यो। ई रा तैत नगर निगम हेरिटेज री ओर ऊं एक महीना ताई रोजीना न्यारा-न्यारा कार्यक्रम राख्या जावेला। नगर निगम री महापौर कुसुम यादव बतायो के ई रा तैत राजस्थानी कार्यक्रम,

सूफी कार्यक्रम, हैरिटेज वॉक, कथक नृत्य अर बॉक्स क्रिकेट सरीखा कार्यक्रम राख्या जावेला। वे बतायो के 21 अक्टूबर ने जल महल री पाल माथे सांस्कृतिक कार्यक्रम राख्या जावेला। 22 अक्टूबर ने बड़ी चौपड माथे कव्वाली रो कार्यक्रम वेला। ई सागे ई बॉलीवुड नाईट, भजन संध्या अर कवि सम्मेलन ई राख्या जावेला।

000

प्रदेश रो पहलो मधुमक्खी पालन उत्कृष्टता केंद्र भरतपुर मांय खोल्यो जावेला। म्हाणा भरतपुर खबरनवीस बतायो के ई सारु सेवर पंचायत समिति रा मई गुर्जर गांव मांय करीब 10 हेक्टेयर जमीं आवंटित कर दीरीजी है।

.....

000

सिरोही जिला रा आबूरोड़ मांय सशक्त राजस्थान रा तहत लगायी ज्यी तीन दिन री प्रदर्शनी आज पूरी व्हे गयी। प्रदर्शनी रा समापन समारोह मांय जन स्वास्थ्य अभियांत्रिकी अर भूजल मंत्री कन्हैयालाल अर सांसद लुंबाराम चौधरी ई शिरकत कीनी। ई मौके केंद्र अर राज्य सरकार कानी ऊं चलायी जा रही जनता रा भला री योजनावां रा बारा मांय ई जाणकारी दीरीजी। प्रदर्शनी मांय केंद्र अर राज्य सरकार रा न्यारा-न्यारा महकमां री ओर ऊं स्टॉल लगायी ज्यी।

000

अजमेर मांय 68वीं जिला स्तर री एथलटिक्स होड़ आज सरु व्ही। विधानसभा अध्यक्ष वासुदेव देवनानी इण रो उद्घाटन कीनो। शिक्षा विभाग री ओर ऊं राख्यी जा रही ई होड़ मांय 70 स्कूलां रा डोढ़ हजार ऊं बत्ता विद्यार्थी शिरकत कर रह्या है। होड़ जीतण वाळा खिलाड़ी राज्य स्तर परां खेलेला। हनुमानगढ़ जिला रा साबुआना गांव रा राजकीय वरिष्ठ उपाध्याय संस्कृत विद्यालय मांय आज संभाग स्तर री बालिका खेलकूद होड़ सरु व्ही। छह दिन चालण वाळी ई होड़ रा जूनियर अर सीनियर वर्ग मांय एथलेटिक्स, कबड्डी, वॉलीबॉल, खो-खो अर बैडमिंटन सरीखी सात भांत री प्रतियोगिता राख्यी जा रही है। होड़ मांय हनुमानगढ़, श्रीगंगानगर, अनूपगढ़ अर बीकानेर जिलां री 27 टीमां शिरकत कर रही है। शाहपुरा जिला रा रायला मांय लड़कियां री 68वीं जिला स्तरीय एथलेटिक्स अर सांस्कृतिक होड़ आज सरु व्ही।

000

टोबैको फ्री यूथ कैम्पेन 2.0 रा तैत पाली जिला मांय नौजवानां ने तंबाकू रा गलत असर रा बारा मांय जाणकारी देवण सारु शहर रा एक गैर- सरकारी बी.एड. कॉलेज मांय अध्यापिका री सिखावण ले रही विद्यार्थियां ने तम्बाकू रा गलत असर रा बारा मांय जाणकारी दीरीजी। वां ने सिगरेट और अन्य तम्बाकू उत्पाद कानून री जाणकारी ई दीरीजी।

000

उदयपुर जिला रा गोगुंदा, बड़गांव अर नाई हलकां मांय लारला दिनां इन्सानां अर जिनावरां रो शिकार करण वाळा बघेरा ने आज मार दियो ज्यो। पुलिस अर वन विभाग री टीम मिल र आ कार्यवाही कीनी। आदमखोर बघेरो बड़ी कने एक सिपाही माथे हमलो कीनो, ज्यीं पाछे बघेरा माथे गोळी चलायी ज्यी जिण ऊं वां री मौत व्हे गयी। बघेरा री लाश नाव ऊं चेतक सर्कल रा जिनावरां रा अस्पताल पूगयी ज्यी, जठे वां रो पोस्टमार्टम करी ज्यो। पोस्टमार्टम पाछे बघेरा रो दाग कर दियो ज्यो। इण ई बघेरा रे आदमखोर व्हेवण री ठा करण सारु वां रा नमूना जांच सारु देहरादून फोरेंसिक जांच लैब मांय भेजा जावेला। हल्का मांय पुलिस जाब्तो तैनात है।

000